


## **PR seidauk submete pedidu fiskalizaun abstratu OR ba Tribunál Rekursu**



Prezidente Repúblika José Ramos Horta. Imajen Tatoli/Francisco Sony.

DILI, 27 maiu 2022 (TATOLI) – Prezidente Repúblika, José Manuel Ramos Horta, seidauk submete pedidu fiskalizaun abstratu ba Tribunál Rekursu kona-ba Orsamentu Retifikativu tanba sei konsulta ho Parlamentu Nasionál.

“Primeiru iha parlamentu, liuliu bankada CNRT sei haree lai, tuir prosedimentu ka lae, orsamentu ne’e tuir konstituisaun ka lae, depois maka ha’u haree, hodi haruka ba Tribunál, tanba halo orsamentu ne’e lalais, hanesan halo fali iha dalan de’it. Ne’e preokupasaun boot iha públiku,” José Ramos Horta informa ba jornalista sira bainhira partisipa serimónia loron Europa ne’ebé selebra iha Timor Plaza, sesta ne’e.

Razaun Ramos Horta husu fiskalizaun abstratu Orsamentu Retifikativu tanba aprovasaun no promulgasaun lalais liu, maibé proposta Governu apresenta orsamentu ne’e ho karáter urjénsia entaun parlamentu aseita proposta ne’e.

Maske husu fiskalizaun maibé iha tempu Prezidente Repúblika, Francisco Guterres ‘Lú Olo’ promulga ona orsamentu ne’e, no VIII Governu Konstituisionál fó-sai ona pozisaun katak, ezekusaun ba Orsamentu Retifikativu kontinua la’o.

Entretantu, Parlamentu Nasionál aprova proposta Orsamentu Retifikativu ho total \$1,241,210.748 iha finál globál ho votu a-favór 36, kontra 22 no abtensaun lima.

Enkuantu Proposta OR ne’ebé antes ne’e Governu apresenta ho montante \$1,129 maibé durante diskusaun espesialidade deputadu sira apresenta tán proposta adisionál kuaze millaun \$100-resin, nune’e proposta OR aumenta ba \$1,241,210.748.

Ho aprovasaun OJE Retifikativu 2022 ne’e, lori mudansa iha dotasaun orsamentál, ezemplu, Reseita Globál Konsolidada sa’e ba \$3,348,070.979 no Despeza Globál Konsolidada \$3,347,457.179.

Orsamentu Órgaun no Servisu Administrasaun Sentráal hetan aumentu \$1,241,210.747 no ninia total agora sa’e ba \$3,100,688.695, ne’ebé fahe tuir kategoria klasifikasaun ekonómika hanesan Transférénsia Públika ho montante \$1,950,982.687; Bens no Servisu ho montante \$467,077.382; Kapitál Dezenvolvimentu \$390,177.399; Saláriu no Vensimentu \$250,537.130; no Kapitál Menór \$41,914.097.

**Jornalista : Natalino Costa      Editór : Evaristo Soares Martins**